

## Program RISE bantu OKU jana pendapatan

Kekurangan diri bukan alasan atau batu penghalang untuk meneruskan kehidupan, sebaliknya setiap insan perlu memiliki impian untuk berjaya dalam hidup tanpa mengira status dan nasib yang menimpa diri. Menerusi program 'Reach Independence & Sustainable Entrepreneurship' (RISE) dibangunkan Yayasan Maybank, kedudukan ekonomi, kemahiran dan kemampuan golongan orang kelainan upaya (OKU) diperkasa.

Ketua Pegawai Eksekutif Yayasan Maybank, Shahril Azuar Jimin, berkata program RISE yang diletakkan di bawah program Maybank-Mentor Komuniti Kurang Upaya, memberi latihan keusahawanan dan kewangan, diikuti pemantauan mentor selama enam bulan. Program latihan keusahawanan RISE itu bertujuan memperkasa golongan OKU bagi menjana pendapatan sendiri melalui latihan dan program mentor berstruktur.

"Setiap peserta yang berjaya dalam program perintis akan diberi kelayakan untuk memohon bantuan kewangan bagi mengembangkan lagi perniagaan mereka, selain perlu menjalani sesi latihan keusahawanan dan kewangan selama tiga hari. Peserta juga akan dibimbing untuk membangunkan



(Dari kiri) Pegawai Bertugas untuk Maybank Filipina, Hazli Abu Samah; Pengarah Bangko Sentral ng Pilipinas, Pia Tayag; Pengerusi Maybank, Datuk Mohaiyani Shamsudin; Timbalan Bendahari Jabatan Kewangan Filipina, Peguam Gisela F Loot; dan Shahril menyampaikan Simbolik Penyerahan kepada Maria Fe Maravillas dan Marcelo Jaymalin.

kemahiran keusahawanan menerusi modul yang direka," katanya pada sidang media majlis pelancaran program perintis RISE di Manila, Filipina.

Shahril berkata, bertitik tolak daripada kejayaan di Malaysia dan Indonesia yang sudah memulakan program itu di Filipina dengan memilih seramai 255 individu dari Cebu dan Manila. Da-

lam tempoh hanya tiga bulan, RISE melatih lebih 117 peserta dari Manila dan 138 individu dari Cebu tanpa memberi sebarang bantuan kewangan pada peringkat permulaan.

"Setakat ini, 40 peratus kumpulan perintis yang dilatih melalui program RISE berjaya merekodkan kenaikan purata pendapatan sehingga 250 peratus. Lebih membanggakan, ada peserta yang

dahulunya langsung tidak mempunyai sebarang sumber pendapatan, namun, kini mampu meraih sehingga 35,370 peso (RM3,070)," katanya.

Shahril berkata, RISE adalah inisiatif pihaknya untuk melaksanakan program kemampanan korporat dan mengembangkan perniagaan usahawan OKU di rantau Asia Tenggara.

"Peserta program ini dipilih daripada lebih lapan badan atau persatuan OKU yang mempunyai minat dalam dunia perniagaan. Berbeza dengan projek keusahawanan lain, program ini tidak menyalurkan bantuan kewangan secara terus kepada peserta, sebaliknya peruntukan kewangan diberikan melalui latihan, bagi memastikan kelangsungan kejayaan mereka," katanya.

Sementara itu, seorang peserta program RISE, Proceso Escala Jr, berkata sejak menyertai program itu pada Februari lalu, pendapatannya meningkat daripada 9,000 peso (RM780) kepada 34,250 peso (RM2,969), dalam tempoh hanya tiga bulan. Proceso yang menghidap penyakit polio, berkata di peringkat awal kerjayanya sebagai jurugambar dan juruvideo, dia berdepan pelbagai masalah, antaranya persaingan dengan jurugambar profesional.